



REPUBLIKA E SHQIPËRISË
**AUTORITETI I KONKURENCËS
KOMISIONI I KONKURENCËS**

VENDIM

Nr. 511, Datë 10.05.2018

“Mbi autorizimin e përqendrimit në lidhje me përfitimën e kontrollit të përbashkët nga BMW dhe Daimler AG mbi disa shoqëri”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 10.05.2018, shqyrtoi çështjen me:

Objekti: Autorizimi i përqendrimit të realizuar nëpërmjet përfitimit të kontrollit të përbashkët nga BMW dhe Daimler AG mbi disa shoqëri.

Baza Ligjore: Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, nenet 2, 10-12, neni 24, germa d, dhe nenet 53-64. Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit” dhe formulari i njoftimit të përqendrimit”.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë, mbi njoftimin e përqendrimit mbi përfitimën e kontrollit të përbashkët nga BMW dhe Daimler AG mbi disa shoqëri.

VËREN SE :

1. Transaksioni dhe përqendrimi

Në Autoritetin e Konkurrencës është depozituar shkresa me Nr.250 Prot., datë 17.04.2018 ku informohemi në lidhje me një përqendrim të ndodhur midis BMW dhe Daimler.

Nëpërmjet kësaj shkrese informohemi se shoqëritë, të cilat janë prodhues automjetesh kanë nënshkruar në datat 27 dhe 28 mars 2018, një marrëveshje sipas të cilës do të kenë kontrollin e përbashkët mbi 6 sipërmarrje të përbashkët (*joint venture*). Këto shoqëri do të bashkojnë shërbimet që ato ofrojnë në pesë fusha të ndryshme biznesi të tilla si:

qiradhënia e makinave (*car sharing*); shërbim taksi nëpërmjet aplikacioneve (*ride hailing*); shërbime parkimi, shërbimi i karikimit të automjeteve si dhe shërbime të tjera sipas kërkesave të klientëve (*on-demand*), ndërkohe që ndërmarrja e 6 (*joint venture* e 6) do të menaxhojë markat tregtare në lidhje me bizneset e mësipërme.

Pas transaksionit, dy shoqëritë do të kenë përkatësisht secila nga 50% të aksioneve dhe të drejtave të votës në të gjitha shoqëritë e krijuara

Autoriteti i Konkurrencës me shkresën Nr. 250/1 Prot., datë 26.04.2018 i ka konfirmuar përfaqësuesit ligjor të palëve se njoftimi i përqendrimit është i saktë dhe i plotë dhe se kanë filluar procedurat e kontrollit të këtij përqendrimi. Gjithashtu është përgatitur informacioni për Komisionin dhe njoftimi për shtyp.

Palët në transaksion janë:

Daimler AG, shoqëri aksionare, është prodhues global i veturave të cilësisë shumë të lartë dhe prodhuesi më i madh në botë i mjeteve lëvizëse komerciale. Ndarjet e aktivitetit të Daimler janë veturat Mercedes-Benz; kamionët Daimler, Fugonët Mercedes Benz, Autobusët Daimler dhe Shërbimet Financiare Daimler. Është shoqëri e listuar sipas ligjit gjerman, me seli qendrore të regjistruar në Stuttgart, Gjermani që operon në zhvillimin, prodhimin dhe shitjen kryesisht të makinave për pasagjerë dhe automjeteve për qëllime tregtare, si dhe ofron shërbim financiar për automjete, duke përfshirë financimin, qiranë financiare, sigurimin dhe shërbime për menaxhimin e flotave.

Bayerische Motoren Werke Aktiengesellschaft (BMW) është një shoqëri aktive në prodhimin e motoçikletave dhe automobilave. Përveç zhvillimit, prodhimit dhe marketimit të këtyre automjeteve, BMW gjithashtu ofron shërbime financiare për klientë privatë apo biznese. Me markat BMW, Rolls Royce dhe MINI, BMW është një nga prodhuesit më të suksesshëm të makinave për pasagjerë dhe motoçikletave në nivel botëror dhe ofron gjithashtu shërbime Premium në fushën e transportit individual, me seli në Mynih Gjermani.

Marrëveshja e Biznesit është lidhur në datat 27 dhe 28 mars 2018 midis palëve:

- Daimler AG (Daimler Mobility Services GmbH) dhe
- BMW (BMW Intec Beteiligungs GmbH; BMW i Ventures B.V; Car2go Deutschland GmbH; Blitz 18-353 GmbH; Parkmobile Group Holding B.V; Digital Charging Solution GmbH; Moovel Group GmbH; Blitz 180354 GmbH)

BMW (duke përfshirë edhe filialet e BMW) dhe Daimler AG (duke përfshirë edhe filialet e Daimler), do të përfitojnë kontrollin e përbashkët në 6 sipërmarrje të përbashkëta / *joint venture*, duke bashkuar shërbimet e ofruara nga palët në pesë fusha të ndryshme biznesi:

- qiradhënia e makinave (*car sharing*);
- shërbim taksi nëpërmjet aplikacioneve (*ride hailing*);
- shërbime parkimi,
- shërbimi i karikimit të automjeteve si dhe
- shërbime të tjera sipas kërkesave të klientëve (*on-demand*),

- Ndërmarrja e 6 do të menaxhojë markat tregtare në lidhje me bizneset e mësipërme.

Transaksioni i realizuar ka të bëjë me përfitim të kontrollit, të parashikuar në nenin 10, germa c), të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, dhe palët pjesëmarrëse plotësojmë nivelin e xhiros të përcaktuar në nenin 12, pika 1 të Ligjit. Për rrjedhojë ky transaksion iu nënshtrua procedurës së kontrollit të përqendrimeve të parashikuar në nenet 53 – 64 të tij.

2. Vlerësimi i përqendrimit

Transaksioni i njoftuar është përfitim i kontrollit të përbashkët i shoqërisë BMW dhe Daimler mbi 6 shoqëri të përbashkëta JV me funksione të plota.

Tregu shqiptar nuk do të preket nga transaksioni i propozuar, pasi JV-at nuk kanë për qëllim të kryejnë në të ardhmen e parashikueshme ndonjë aktivitet në Shqipëri, prandaj transaksioni i propozuar nuk ka asnjë impakt për konkurrencën në tregun e brendshëm.

Pas transaksionit nuk do të ketë asnjë ndryshim në strukturën e tregut përkatës në Shqipëri.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet përfitimit të kontrollit të përbashkët nga BMW dhe Daimler AG mbi disa shoqëri.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS